

Certificazion dal furlan: gnûfs struments didatics e formazion pai prins certificadôrs

*Realizâts de Universitât
 furlane in colaborazion
 cu la Regjon
 e cu la ARLeF*

La ARLeF e la Universitât dal Friûl, cu la presince de assessore regjonâl ae Istruzion, ricercje e universitât, **Alessia Rosolen**, a à presentât di pôc i gnûfs struments didatics che a permetaran di inviâ la certificazion de lenghe furlane, daûr de leç regjonâl 29 dal 2007. Al è un dai prins pas previodûts dal acuardi firmât dai doi ents, che si son impegnâts a colaborâ inte organizazion di cors di formazion e inte realizazion e publicazion di tescj e struments didatics par imparâ la lenghe furlane.

I trê volums – curâts de professore **Fabiana Fusco** e risultât dal lavôr plurienâl fat dal Ateneu furlan cu la poie dal Assessorât regjonâl ae Istruzion – a permetaran di valutâ i nivei progressîfs di competence (A, B e C), su la fonde di ce che al è previodût dal Cuadri comun european su lis lenghis.

Cemût che e à ricuardât la assessore, il plurilinguism al fâs la nestre



Di çampe: Eros Cisilino, president de ARLeF; Alessia Rosolen, assessore regjonâl ae Istruzion, ricercje e universitât; Enrico Peterlunger, delegât dal retôr pe promozion de lenghe e de culture furlane - Universitât dal Friûl.

Regjon uniche in Italie, stant che al rapresente un valôr di fonde pe sô autonomie e pe sô specialitât, e la certificazion de lenghe furlane e je un passaç fundamentâl par alçâ in mò il so status, come che al sucût par dutis chês altris lenghis.

Il president de ARLeF, **Eros Cisilino**, al à definît l'inviamant dal sisteme di certificazion tant che une svolte storiche. Par che une lenghe si slargji e par che e davuelzi in maniere juste il so rûl, si à ancje di sigurâsi che

e vegni doprade, massime intal scrit, in maniere corete, di bande di insegnants, operadôrs linguistics, funzionaris publics o altris sogjets clamâts par leç a cognossile. I gnûfs struments didatics, al à rimarcât il retôr **Roberto Pinton**, a son un risultât di grande impuartance pe difese dal patrimoni linguistic e culturâl dal Friûl. Come che al à ricuardât il professor **Enrico Peterlunger**, delegât dal retôr pe promozion de lenghe e de culture furlane e diretôr dal Cirf, la Universitât dal Friûl e à puartât indevant cun rigôr scientific, precision e completece la elaborazion dai criteris e dai materiâi pe certificazion. La seconde fase dal progjet e previôt la formazion dai prins certificadôrs che a varan di valutâ lis competencis linguistichis di cui che al domandarà di jessi certificât pes capacitâts di scole, leture, conversazion, scritture e interazion par furlan. Il cors formatîf al sarà organizât in curt de Universitât dal Friûl.

Par info su cemût vê i libris di test, al è pussibil lâ sul sît www.forumeditrice.it/percorsi/lingua-e-letteratura.

Scuele: a cressin lis adesions ae lenghe furlane

La istruzion e je un dai ponts centrâi dal "Plan gjenerâl di politiche linguistiche pe lenghe furlane 2021-2025" fat bon de Regjon daûr de propueste de ARLeF. Fra i trê macro obietîfs fissâts dal Plan al è di fat chel di garantî l'aprendiment de lenghe furlane a scuele, e i numars des adesions di bande dai gjenitôr nus disin che la plui part dai Furlans lu condivit.

Tal câs de scuele de infanzie e de primarie, i arlêfs a son passâts dai 39.267 dal an scolastic 2019-2020 ai 33.893 dal 2021-2022, cuntune incessoite percentuâl sensible di scuelârs che si zovin des lezioni di furlan. Se tal 2019-2020 o jerin al 76%, tal an presint si fevele dal 80%. Te secundarie di 1n grât, là che doi agns indaûr lis adesions si fermavin al 45%, si è passâts al 50%.

*«La cussience dai gjenitôrs sui vantaçs di une formazion plurilingâl e je daûr a madressi an par an e je cressude in maniere sigure e evidente» al à comentât il president de ARLeF, **Eros Cisilino**.*